



Stephanus hic in Germania oriundus, & omni genere literarum excultus fuit. fecere etiam mirabiles eius uirtutes, ut omnium regum & principum fauorem adeptus sit. hinc factum ut per uarias dignitatum gradus primus tandem ex Germanis ad fastigium Romani pontificatus ascenderit, anno noningentesimo quadragesimo. Cum autem insigni mansuetudine esset præditus, & pacis studia bellis & tumultibus præferret, æmuli eius ingenti ipsum odio persecuti sunt, donec tandem seditionem popularem contra eum excitarunt. Propterea is Romæ uarijs moribus agitatus, tandem in maximum discrimen incidit. Inualescentibus enim aduersarijs, grauius uulneratus & miserè mutilatus est, ut diu cicatricum deformitate in publicum prodire abstinerit. Huius rei indignitate Hugo rex Italiæ motus, arma ad eam iniuriam uindicandum parauit. uerùm morte præuentus rem tantam exequi non potuit. Nec Lotharius eius filius, qui post patrem Italiæ Imperio potitus est, grauis in illos animaduertit, fortassis quia neminem ex Romanis proceribus lædere ei tutum uidebatur, uel quod & ipse non diu superstes mansit, nam biennio tantum rebus præfuit.